

周易象旨决錄

以



周易上經象旨決錄卷之三

原任禮部郎中四川富順南沙熊過著

門弟南墩熊迴重校

同人



離下
乾上

坎離皆乾坤之用易至同人十二卦坎體凡六見矣離自需訟小畜履四卦互體見之至同人十三卦而正離見十四卦而六離之用始與坎等然離之用隱者過半矣聖人處憂患而用明如此夫

同人于野亨利涉大川利君子貞

彖曰同人柔得位得中而應乎乾曰同人同人曰同

人于野亨利涉大川乾行也文明以健中正而應君子正也唯君子爲能通天下之志

同人柔得位得中而應乎乾曰同人指二之同乎九五也五外卦野之象也同人于野亨利涉大川指五陽之同乎六二也以陰居陰太陰水象六二坤爻九五者乾爻故曰乾行耳虞翻乃謂乾四上失位變而體坎故曰利涉大川乾行獨取四上失位者若得位者不變失位者變易中无其例矣侯果謂九二升上爲郊野是同人於野而得通者由乾爻上行故特曰乾行不即本卦六二爲言而以

虛位九二立義同人安從得九二之升哉程先生以天德釋之得其理而不及卦爻之旨王輔嗣曰非二所能是乾之所行蓋近矣柔之應乾不曰君而人者无乎君之辭也虞翻旁通師卦震夫巽婦所謂二人同心者而言人豈其旨哉同人大有皆五陽而一陰主之大有之陰在五故曰元吉同人之陰在二而群陽宗之則曰亨曰利君子貞君臣之間功名之際其難乎

象曰天與火同人君子以類族辯物

黃潤玉曰天上運火上炎類也故曰與

初九同人于門无咎象曰出門同人又誰咎也

初前遇六偶爲門象變則成艮亦爲門闕

六二同人于宗吝象曰同人于宗吝道也

二宗者胡仲虎曰二往同五復成離五來同二復成乾乾離各反其本之謂宗又禮繼別宗繼小宗皆言尊也詩云君之宗之陽爲陰之宗也吝猶言嗇主一不他之意六二成卦之主又居陰專之位應乾者如此荀爽以宗爲衆曰陰道從一而衆陽皆欲與二爲同故吝不知二中正同人之義侯果一殆程朱二說所主本其謂所同雖吝亦臣妻之道

者近之若如程朱謂宗黨故吝則五同二亦宗黨者象繫之曰同人之先以中直何也於是復以宗爲初斯爲不違象義哉

九三伏戎于莽升其高陵三歲不興象曰伏戎于莽敵剛也三歲不興安行也

三五巽爲伏互離兵戈伏戎之象巽又爲草木二成巽之主也巽爲股爲高象升高三動互艮山象高陵蓋龍斷而左右望也三與二相比欲同人焉不慮二不從而息五得二隱兵於二將上襲五故升高而伺遂與爲敵然五剛中正而卒不可與爭

爻在三乾為歲故三歲不興安可行也

九四乘其墉弗克攻吉象曰乘其墉義弗克也其吉則困而反則也

二離中虛外周象墉九三為六二之墉九四亦欲得二乘二之墉將攻而取之其材陽也弗克攻者其位陰也卦惟三四不言同人二與五相同而三四有爭奪之象非同者也

九五同人先號咷而後笑大師克相遇象曰同人之先以中直也大師相遇言相克也

五先號咷者互巽其究為躁也二得位得中而應

五三四失義而近據之未獲同心故先號咷後笑者五動互為說大師克相遇者二坤爻為師二本成離之主以師克三四而與五相遇也本相應而言遇者不期而會也克敵而忽遇喜之辭亦見同人之難也畫卦者先下同人之先指二也中謂居下卦之中直坤爻之德也吳幼清以號咷為六二離火之聲大師者同人六畫俱變成師師以坤為衆坤衆自乾陽變為大師此占五耳而旁及他爻吳氏非也

上九同人于郊无悔象曰同人于郊志未得也

郊者俞氏指邑外為郊在野內二體言五去二遠為野外體言上去五近為郊同人之世物情未能无爭五雖同體而自處其上其為同坎過俱亡故无悔而已其何以通天下之志哉志未得與通天下之志正反

字音句無誤

大有三三乾下

大有元亨彖曰大有柔得尊位大中而上下應之曰大有其德剛健而文明應乎天而時行是以元亨何以謂之大中五大而二小以別之也諸爻得位失位並無凶咎以其皆應五也五雖得應而才終

張相感曰疑是五小而天想以五為位為大規尊位二字可見此非大手

柔不足為主必有待乎陽剛而後亨同人履應其德故曰乾大有應其時故曰天大有之君有其位有其德又有其時矣同人曰文明以健自明而誠者乎大有曰剛健而文明自誠而明者乎

象曰火在天上大有君子以遏惡揚善順天休命

初九无交害匪咎艱則无咎象曰大有初九无交害也

何以謂之无交蘇氏曰二應於五三通於天子四與上近焉獨立无交者初而已何以謂之害正應之四為離惡人則有害矣俞氏兼應承兩剛非也

初居孤遠无交者勢耳非其咎也艱謂不敢輕進
求交揚敬仲曰害害道也乾初貴潛需初貴不犯
難獲初貴獨行在大有獨貴交也亦通然上有離
明之主不可苟進故艱則无咎艱者不苟以為倖
也

九二大車以載有攸往无咎象曰大車以載積中不
敗也

坤大輿指軫方能載者言二體乾稱大車以全體
言也二虛足以受九剛足以行與大畜之二同蘇
氏指為五蓋失之矣大體剛履二一中也有應於五
則積中矣虞翻曰二以積皆中而不敗是也

九三公用亨于天子小人弗克象曰公用亨于天子
小人害也

三居下卦之上有公象剛而居正不以有自私有
亨象天子謂五四離惡人當三之前三之應五四
或間之未能遽達之象也

九四匪其彭无咎象曰匪其彭无咎明辯哲也

彭盛也詩載驅出車皆取人馬強盛為彭今日匪
彭諸陽皆為六五所有非九四之盛也故象以明
辯哲表之四在三陽之上勢逼六五別嫌多懼有

由然矣

六五厥孚交如威如吉象曰厥孚交如信以發志也威如之吉易而无備也

六五下應九二之剛而得其助故威如其體文明其德中順威如者如威而已侯果曰爲卦之主有威不用唯行簡易无所防備物感其德翻更畏威是也然則有大者可易而无備乎曰非信以發志者則必廢交相爲用耳道德之威不怒而威於鈇鉞者也

上九自天祐之吉无不利象曰大有上吉自天祐也

履信思順而上賢五之事也上者天之位也自天祐之祐五也所謂柔得尊位而上下應之者陽多陰少少者爲主故雖上稱應

句字音无誤

謙 三三 艮下

謙 亨君子有終

虞翻曰君子爲三艮終萬物有爻於其道之象終下說苑有吉字韓嬰詩外傳曰能以此終吉者君子之道今謂亨通而有終則卦係君子若爲羨文矣

彖曰謙亨天道下濟而光明地道卑而上行天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也

天道指九三下濟者居坤之下交際之間也艮有光明之象上行謂坤謙尊而光言其下濟乎卑不可踰言其上行乎

象曰地中有山謙君子以裒多益寡稱物平施

初九謙謙君子用涉大川吉象曰謙謙君子卑以自牧也

謙之下稱謙謙大川者荀爽曰九三互坎也稱自牧養以待用之謂之艮止之象也蘇氏曰謙之過无所用之用於涉川而已番陽齊節初曰九三勞而謙二四上爲九三而謙初无所爲故曰自牧

六二鳴謙貞吉象曰鳴謙貞吉中心得也

姚信曰承震爲善鳴蘇氏謂陰陽唱和寄之於鳴與三相從者得之以六居二故爲貞朱先生曰謙極有聞是謙鳴而非鳴謙矣得者德也謙者心德也謙之鳴謙于外飾故表之曰中心得積中發外豈但聲音笑貌哉

九三勞謙君子有終吉象曰勞謙君子萬民服也

蘇氏曰艮之制在三而三觀以艮下坤故曰勞謙
荀爽曰躰坎爲勞亦未盡也九三居艮之終故以
彖辭君子有終屬之陽爲民服者群陰歸之
六四无不利撝謙象曰无不利撝謙不違則也

說文云撝裂也從手爲聲手容恭也六四乃上下
之際才位皆陰故不敢當陽之承撝裂退讓去位
以避之禮言恭矣非謂更當發揮其謙也則也者
天則以柔居柔之則也

六五不富以其鄰利用侵伐无不利象曰利用侵伐
征不服也

五陰爻之虛爲不富謂不自滿也以者用也三非
正應故稱鄰六二近暱九三而不服五三五同功
故五用三爲帥互震長子帥師從民望而伐之柔
順得中用於謙者如此侵依郭京舉正作征越已
之分乃爲侵君上所行祇合征正之也

上六鳴謙利用行師征邑國象曰鳴謙志未得也可
用行師征邑國也

三謙之主上與爲應鳴謙之象師謂坤爲衆應震
爲大塗征象上四同躰五坤爲王都四近五上公
采地蓋私邑附庸也四據上之應上以極謙得陽

剛之助故利征之九家易以上呼三來居五為利
行師虞翻以利五之正已得從征非卦義矣上鳴
謙異于二何也二外比震由衷而鳴其謙於外上
下應震自上而鳴其謙于下由衷者情自上者地
望所據有非其心者矣

脫誤

依說苑韓詩外傳
彖辭終下脫吉字

豫

䷏ 坤下
震上

豫利建侯行師彖曰豫剛應而志行順以動豫豫順
以動故天地如之而况建侯行師乎天地以順動故
日月不過而四時不忒聖人以順動則刑罰清而民

服豫之時義大矣哉

九家易曰震為建侯坤為行師蓋震長子主器又
雷震驚百里一同古分壤之則說卦傳坤為衆四
互坎險以一陽統衆陰即師象也國語稱居樂出
威德之吳幼清指坤為震侯國震為坤衆帥也四
主衆陰成卦之主不曰上下應而曰剛應何也豫
有君弱臣強之嫌且非五應亦不得行其志也聖
人明微據實為之辭曰剛柔云耳五柔四剛也項
氏玩辭曰豫隨始旅若淺事而有深意曰時義大
矣哉欲人之思之也坎之險難睽之乖異蹇之跋

涉皆非美事有時或用之故曰時用大矣哉欲人之別之也願大過解革皆大事大變故曰時大矣哉欲人之謹之也

象曰雷出地奮豫先王以作樂崇德殷薦之上帝以配祖考

崇德深居馮氏謂褒崇其德易繫帝出于震震在上上帝之象互艮為門闕互坎為隱伏有宗廟祖考之象節初齊氏曰仲春雷乃發聲春禘有樂秋嘗雷乃收聲是以無樂按詩蒸嘗衍烈祖則固有樂齊氏言乃自構不本經義矣郭兼山謂大司樂

奏圜鍾于圜丘圜鍾亦二月律周郊正以后稷配然郊特牲云周始郊日以至則雷在地中矣豈始用冬至而周公用仲春乎抑舉先王為辭周以前實用仲春也夫齊氏不考於迎長初製之辨也初六鳴豫凶象曰初六鳴豫志窮凶也

初陰柔居豫初而不中正靜而不動順而不健志安夫豫又有四震由豫權臣之應而為善鳴蓋不勝其有矣其凶以盈滿也卦初非窮地故以志表之

六二介于石不終日貞吉象曰不終日貞吉以中正

也

爻義交現下並作
爻似不必

四互艮為石則二為艮始介說文云分疆也凡物
兩間為介介所以分也初應于四者二與之介下
交不瀆也二變為剛則互離三雖離中而在下卦
之上日終之象四為權臣而三比之二以重陰性
靜不待至三能早脫出豫之交上交不諂也

六三盱豫悔遲有悔象曰盱豫有悔位不當也

盱依姚信作盱日始出承二終日之辭言早也六
三順動之交近震旭日始且比于由豫之交蓋早
豫之象也以其居順極而又互艮之中故知所悔

然以陰居陽不能帥志窒欲至于遲豫又有所悔
也蓋不可與立矣

九四由豫大有得勿疑朋盍簪象曰由豫大有得志
大行也

四互坎有疑象九才剛故勿疑朋依一行作用卦
惟一陽五陰非其朋也坤為盍聚會也簪如士喪
禮以爵弁服簪裳於衣之簪連也晁景迂曰古冠
禮未有簪名冠簪之訓至侯果始有之耳程先生
釋簪為聚朱先生兼取疾義皆非也按簪京氏作
摻蜀才同摻蒼云疾也是疾本訓摻而非簪也然

則釋為連者眷之正義也四之所得有豫者有貞者不必能同而皆所疑也大有得者一剛之得五柔用盍眷者五柔之合一剛也志大行者剛應而又無它爻以分其權也以其樂與人同存心于天下者之所為也

六五貞疾恒不死象曰六五貞疾乘剛也恒不死中未亡也

當豫而乘山豫之剛故貞疾與他卦乘剛者亦異矣俞氏曰所以恒不死者柔得中而元大過雖為陽剛所逼猶存虛位蓋未亡也

上六冥豫成有渝无咎象曰冥豫在上何可長也

上以陰柔居豫極迷而忘返五柔同豫如結成之象然本動體又變剛成離破冥則其成渝矣

正字

據增一行册作用

據姚信野豫之野作野

隨三三

震下兌上

隨元亨利貞无咎

彖曰隨剛來而下柔動而說隨大亨貞无咎而天下隨時隨時之義大矣哉

剛柔震剛而兌柔也陽上陰下者體也今震陽在下若自上而來故稱來內辭也虞翻蜀才吳幼清

皆以爲自否來朱義主困噬嗑未濟三卦俞琰主
蠱皆非也左傳穆姜以元亨利貞爲隨四德與傳
異

象曰澤中有雷隨君子以嚮晦入宴息

九家易曰兌澤震雷八月之時雷藏于澤者得之
震東方卦日出之地曰暘谷兌西方卦日入之地
曰昧谷今自震東趨兌西嚮晦之象卦互巽入艮
止入而止息之象也侯果曰坤爲晦乾之上九來
入坤初嚮晦坤初升兌爲休息入宴非也

初九官有渝貞吉出門交有功象曰官有渝從正吉

也出門交有功不失也

主守爲官蜀才謂館非也震爲長子主器官之象
九家易是矣夫法之畫一莫嚴於官而初爲震立
有渝之象初以剛居剛二以柔居柔皆正也故初
隨二不爲詭隨者兩正相依貞吉之象也朱先生
曰旣隨則有所偏主而變其常初九於何得偏義
哉出門交有功震爲大塗二陰象門鄭康成曰震
爲日門通釋因言震卯有出門象非也交謂二也
二與四同功而二多譽故稱功初交有功而三失
丈夫者卦六爻皆取隨義初隨二二隨三三隨四

四隨五五隨上也

六二繫小子失丈夫象曰繫小子弗兼與也

小子指三五艮少男之象程朱二先生謂初陽非也震長男何謂小子乎二之繫小子六三也其丈夫初也三之失小子六二也其丈夫四也是隨之義也

六三繫丈夫失小子隨有求得利居貞象曰繫丈夫志舍下也

捨漢上朱氏音捨王弼作去聲不然下謂小子二也傳義指初俞氏又居貞而止于九四之下皆非

矣

九四隨有獲貞凶有孚在道以明何咎象曰隨有獲其義凶也有孚在道明功也

隨四者自三言之也三隨而有獲四疑於暱矣四多凶近也而况有植黨作福之形哉故貞凶三非正應故曰孚自四言之也震爲大塗曰道互艮光輝曰明言四所孚之三在震道之上以明相接猶言不敢自他途以進也功也自爲句五多功故稱功言四之志率所隨以赴五非植黨也動說之初以陽居陰故其象如此

九五亨于嘉吉象曰亨于嘉言位正中也

嘉猶詩嘉客之嘉上貴而无位稱嘉五處尊而位

中正故能不遺外臣如此若上六過此則道窮矣

五以剛居剛為正
在兌體之中為中

上六拘繫之乃從維之王用亨于西山象曰拘繫之

上窮也

君隨之終而无所隨從象謂上窮是也上也者上

六也以其為五所亨而五互巽繩故有繫維之象

詩白駒繫維嘉客是也王謂五亨陸德明云通也

西者兌方居卦上故象山也處西山而无所從道

思成矣王通西山以求之隨之至也程先生言周

王業亨通于西山之時朱先生直曰自周而言岐

山在西以亨為祭享矣長寧周氏以書多方多士

稱太王文武例定為時王其亦知二先生之誤呂

仲木止疑朱說而從程先生王業之言此近於五

十步之論矣

証音據何氏告蒙約舍音
捨王弼作去讀非

証句以爻辭功也
二字為句

蠱 ䷑

蠱元亨利涉大川先甲三日後甲三日象曰蠱剛上

而柔下巽而止蠱

蠱元亨而天下治也利涉大川往有事也先甲三日後甲三日終則有始天行也

蠱者前人之壞緒四前後之交互兌爲澤有大川之象虞翻謂二動之坎九家復謂自泰來乾天有河坤地有水不可也三五震東爲甲也三日指互震三畫言巽固進退不決苟非艮止于上則亦未蠱若巽而動則爲恒矣先甲三日爲巽初致蠱之由後甲三日則震上飭蠱之極故恒曰終則有始蠱亦曰終則有始馬季長曰艮在東之北巽在東之南而蠱上艮下巽故稱先甲後甲其意先天甲

在東之離由甲逆數離震坤三位而得艮先甲三日也由甲順數離兌乾三位得巽後甲三日耳此其言偶中矣然聖人之取甲于蠱豈徒標其位乎他若虞翻以賁无妄卦變定之旣迂曲不通而子夏傳以癸丁爲言鄭玄以先爲造作新令之日先三日用辛取自新後三日用丁取丁寧朱義從之皆太新巧蘇氏以先三甲申盡于巳而陽盈將亂後三甲寅盡於亥而後變爲終始天行于卦象天道之運雖通而失三日之義矣徐直方曰先三後三爲六爻已終而七則更端七日得七日來復皆

其義所謂終則有始天行也

象曰山下有風蠱君子以振民育德

山下有風則何以蠱邵子曰蠱者風之族也蠱以風化故字從蠱今夫山下有風則木多滯淫而蠱生焉蠱之象也朱先生曰振民有風象育德有山象

初六幹父之蠱有子考无咎厲終吉象曰幹父之蠱意承考也九二幹母之蠱不可貞象曰幹母之蠱得中道也九三幹父之蠱小有悔元大咎象曰幹父之蠱終无咎也六四裕父之蠱往見吝象曰裕父之蠱往未得也六五幹父之蠱用譽象曰幹父用譽承以德也上九不事王侯高尚其事象曰不事王侯志可則也

諸爻取父母之象李吳湛子嘗有說矣有未暢者別衍足其意曰上乾陽居陰父之已歿者五坤中居陽母老而存者蠱父歿母存女長子幼之卦也爻兼取互義初巽女暫攝亡父所遺一家之事也幹蠱者必陽剛初才陰位陽嫌於司晨初之无咎幸籍其子之權也九二兌女專任寡母一身之事也母主乎內之中婦人無外事故獨二言母蠱也

象言得中道中猶內也九三震男有才智而體巽
權故其幹蠱雖有小悔而无大咎六四艮男年幼
稚而當艮止故往見吝往未得言无如蠱何六五
用譽者何也崔子鍾曰六五幹蠱惟在用譽二多
譽也非謂可致聞譽子鍾言是也艮男依母才弱
而志剛故用陽德以輔之承以德二乾爻故稱德
也不事王侯艮爲止也巽言志艮言意皆於主爻
言之剛柔之別也虞翻以爲自泰而變泰初之上
以初與三皆乾乾爲父二亦陽而獨稱母者謂應
在六五也猶爲可解然至上卦則于泰爲坤而六

四六五皆反稱父蠱則旣已不通李鼎祚爻位之
說亦直可施諸下卦而已近江夏劉績以謂九二
幹母爲繼初六之後九三幹父繼九二之後內卦
以家言也外卦以國言也六四外卦繼九三後位
近君乃世臣子承父事之象蓋蠱爲前人已壞之
緒而卦畫以下爲前也至五繼六四亦謂之父者
則曰人君別子故另取位義又復支蔓矣豈所謂
植遺腹朝委裘之時乎

証音

據俞氏先
後皆去聲

臨三三兌下
坤上

臨元亨利貞至于八月有凶

臨八月何子元曰先儒自寅至酉爲觀其說是也
今按李鼎祚自建丑至申爲否虞翻鄭玄自子至
未爲遁者非陽生言七日陰生言八月者陸希聲
言兌在西方月生于西兌象得八故曰八月戒在
遠震在東方日生于東震象得七故曰七日喜于
近七八主靜故于象象言之王介甫詩說云陽生
言日陰生言月沙隨程氏曰陽極于九而少陰生
于八陰之義配月陰極于六而少陽復于七陽之
義配日蓋衍其說也

彖曰臨剛浸而長說而順剛中而應大亨以正天之
道也至于八月有凶消不久也

大亨以正亨通也天指二之剛中也揚敬仲曰惟
民生厚因物有遷與物通者往往失正而况大亨
乎大亨而不失其正者非人之所能爲也大亨人
亨也正人正也而曰天道明其不加人爲也人心
至動至變无思无爲是謂天性之妙天之道也
象曰澤上有地臨君子以教思无窮容保民无疆
朱先生曰教之无窮者兌也容之无疆者坤也
初九咸臨貞吉象曰咸臨貞吉志行正也九二咸臨
吉无不利象曰咸臨吉无不利未順命也

爾雅丘左高爲咸右高爲臨澤上有地是謂丘也
卦惟二陽如復震故有咸臨之象湛先生謂臨之
名義乃上臨下今偏臨者則下臨上不知彖傳剛
浸而長臨所繇取象不必謂上臨下也呂仲木又
引程先生誠感之說謂卦惟一陽乃可言臨按程
先生說出王弼彌棄棄者不足與論咸臨之義也
或曰咸之九四九五降而下接於民則爲臨之初
九九二故曰咸臨張文饒又謂臨初二有咸象以
咸之用在兌之說皆非也未順命者六五在二陰
之間故雖知臨其命未必首當二體兌說嫌於舍
我所學以從上然本剛中而應故有都兪吁咈焉
孔穎達曰斟酌事宜有從有否者是也朱先生未
詳胡安定是景迂馮厚齋曰未羨文不達爻義荀
爽云陽當居五陰當順從今尚在二司馬君實因
謂二在下體小人未盡受命亦非也
六三甘臨无攸利既憂之无咎象曰甘臨位不當也
既憂之咎不長也

三不中不正又兌口柔說互坤土味甘故爲甘臨
之象與甘節之甘異矣動則成乾三惕若憂象也
故无咎同或曰與泰艱貞无咎同以三變成泰項

氏曰六三以甘媚臨而无攸利見二陽之難說既
憂之无咎見二陽之易事也

六四至臨无咎象曰至臨无咎位當也

至臨者坤兌之交地澤相依臨之至也以六居四
正也去其正而止曰位當何也彖傳歸大亨以正
于剛中故不予陰以正也

六五知臨大君之宜吉象曰大君之宜行中之謂也
知如字陸氏作去讀非乾知坤能知指九二乾爻
臨謂二咸臨於巳大謂陽乾君坤藏大君亦指二
宜謂剛中乾九二所謂君德者是也臨之權在二

二以剛中君德未順命以應五五有君位柔順居
中委而聽之各行其中吉之道也劉績引緯書陽
氣在內中和之德應乎盛位浸大之化行于萬民
庶幾近之或曰臨四五自咸初二升而上達於君
若堯之鰥寡无虐者

上六敦臨吉无咎象曰敦臨之吉志在內也

爾雅云如覆敦者敦丘注江東呼地高堆爲敦上
居艮坤二土之終是高地之象柔順於上內臨二
陽以待其進故曰志在內內謂內卦也柔敦有七
義怒派大勉誰何迫聚即无以爲厚者

觀 坤下

觀盥而不薦有孚顒若

觀依陸去讀鄭康成曰諸侯貢士于天子大夫貢士于其君以禮賓之唯主人盥而獻賓賓盥而酢主人設薦則弟子也今觀六爻俱无祭義而有觀國賓王之文漢五行志地上之木爲觀其於王事亦可觀是也自馬季長以盥爲灌地降神王弼因謂祭莫盛乎盥誤盥爲灌矣程先生云不可使誠少散如旣薦後長寧周氏以薦有藉簾而不知薦无亂意謂恭已南面豫殷薦上帝豈可訓亂耶王

肅本作盥而觀薦吳幼清曰敬之感人甚速觀祭者但觀其初盥不待旣薦之後也二家文雖通失本旨矣有孚顒若下之孚也彖傳所謂下觀而化也顒說文云大頭也詩云其大有顒凡卦以初爲下終爲上上二陽頭之象所謂大觀也朱先生止謂尊敬殆有遺論文中子讚易至觀曰可以盡神然乎哉

彖曰大觀在上順而巽中正以觀天下觀盥而不薦有孚顒若下觀而化也

大觀之觀依王肅以觀之觀依徐氏作平讀化者

觀賓興而人知厲矣

觀天之神道而四時不忒聖人以神道設教而天下服矣

陸曰一本作以神道設教晁曰當无以字

象曰風行地上觀先王以省方觀民設教

初六童觀小人无咎君子吝象曰初六童觀小人道也

初以陰居下去五最遠之象吳幼清曰觀艮之互體少男爲童小人无咎君子吝項氏曰百姓日用而不知君子不著不察則可羞矣

六二闕觀利女貞象曰闕觀女貞亦可醜也

三四五互艮爲門闕二以陰柔之小在內雖與五爲應而隔於三四猶女子在門內而窺觀門外也

吳幼清曰初居陽象男童二居陰象女子

六三觀我生進退象曰觀我生進退未失道也

我者三自謂天地之大德曰生而人得以爲生者觀八月之卦刑中有德故以生言六三居下卦之上而近於巽雜卦傳曰巽爲進退故六三自觀其生以審所學猶吾斯未信之意傳義俱謂行事非也朱語類謂六三觀九五爲進退亦非也命氏主

荀爽以我爲五謂三觀五之生意而進退爲有忌
憚夫易有于本爻而稱他爻爲我者乎吳幼清指
主爻爲我其說曰蒙主爻在二其稱童蒙求我謂
二也不知蒙統一卦指主爻爲我爻各即其所居
有必不可相假者中孚吾我而亦以主爻之四附
會之容得不謂之紆曲乎此九三觀我而又指爲
四非尅紆曲乎它卦三不中多不善二中多善觀
獨以遠近取義皆欲觀五也道即生也

六四觀國之光利用賓于王象曰觀國之光尚賓也
觀陰消陽之時以六四爲主爻而逼近九五然以
陰居陰而得正故有此象坤爲國互艮有光五君
位有王象四承五有賓王象國之光即五之我生
者周史謂光遠而自他有耀是矣項氏曰國有光
則賓无光可觀則敵當觀之時聖人懼焉

九五觀我生君子无咎象曰觀我生觀民也

觀作平讀觀之變剝在此然刑中有德故九五以
我所生觀示於人彖所謂中正以觀天下者是也
故有君子无咎之象君子者履中正者也穀梁傳
常事曰視非常曰觀

上九觀其生君子无咎象曰觀其生志未平也


觀者上觀之其指下陰而言于是陰生益盛二陽
漸消之勢決矣上雖未能中正以觀天下然以陽
居陰體巽之極亢而能悔不以无位安然放意此
所以无咎而象表其志也四陰浸長應曰小壯而
名觀者陰本巽順也上必中正然後下觀而化上
九之志未平有以也矣龍仁夫以觀觀无兩音例
依卦名作去讀者非也爻辭五平讀彖傳平讀者

二

証音

彖辭彖傳觀平讀者二証字據陸晁聖人
爻平讀者五去讀一

噬嗑



震下
離上

噬嗑亨利用獄

彖曰頤中有物曰噬嗑噬嗑而亨剛柔分動而明雷

電合而章柔得中而上行雖不當位利用獄也

頤中有物則為噬嗑賁何以不為噬嗑俞氏所謂

噬者必下動賁无震也剛柔分震剛離柔分居內

外非謂三陰三陽也胡氏謂分乾五坤初之剛柔

為震離則益遠矣徐氏曰剛柔分未噬也動而明

將噬也合而章已噬也柔得中上行對賁言之謂

居尊在上而行事也朱義自益六四來非矣簡輔

曰先言得中後言上行因賁之離居下也如本義

爻並平讀
去讀二字

五讀作並下

當作柔上行而得中矣簡言是已五以陰爻居陽
故位不當然柔而得中乃得用獄之宜中則无不
正矣噬嗑剛柔分而柔得中節剛柔分而剛得中
噬嗑有亨有利節有亨有不可貞剛之用豈矣哉
或曰噬嗑巽宮之卦可以權節坎宮之卦為陷非
矣

象曰雷電噬嗑先王以明罰勅法

據蔡邕石經作電雷故軒薛氏曰明罰取火勅法
取雷

初九履校滅趾无咎象曰履校滅趾不行也

初上不言噬无位受刑之象初在卦始罪薄過小
陽剛横亘於震足之下遮沒其趾之象

六二噬膚滅鼻无咎象曰噬膚滅鼻乘剛也

中四爻為用刑象膚鼎肉之大嚙謂二中正而乘
初剛初噬之沒鼻則其噬合矣蓋剛者情多直而
以柔中正聽之必得其情也二互艮四互艮之主
爻為鼻又為黔喙噬膚滅鼻之象爻位以次漸深
噬肉以次漸難六五為難易之中也朱語錄噬膚
而沒其鼻於器中近是矣義謂傷滅者非

六三噬腊肉遇毒小吝无咎象曰遇毒位不當也

三在膚裏稱肉離曰燻之爲腊或曰腊取三剛象肉取六柔象肉藏骨柔中有剛亦通非應稱遇謂四互坎爲毒六三陰柔不中正而近比于四故有噬腊遇毒之象蓋不能用獄矣周禮腊人鄭註云小物全乾曰腊腊之言夕也朝暴于夕乃乾昏禮腊必用鮮是也言肉則无骨然視膚爲難朱先生以爲全體骨而不言小物似而非也當據何氏平讀謂不能承四也二三皆无咎三小吝中正不中正之分也

九四噬乾肺得金矢利艱貞吉象曰利艱貞吉未光也

乾肺馬融曰有骨之謂金矢者何也陸績曰離爲兵矢金矢取其剛直也太平御覽引王肅易註曰四體離乾卦骨之象骨在乾肉脯之象金矢所以獲野禽故噬之反得金矢按四成卦之主頤中之物也四位雖柔而才本剛直四噬則頤合矣噬乾肺故利艱貞得金矢故吉朱先生信周禮鈞金束矢之言非也利艱貞吉何以未光噬乾肺而得金矢斯其人已不爲大畏民志矣

六五噬乾肉得黃金貞厲无咎象曰貞厲无咎得當

也

五之乾肉林黃中曰折肉披筋而燻之似剛非剛似柔非柔也其疑於剛柔以六居五也五成離之主而又柔中黃者中也五變為乾金故曰金項氏曰於四噬其乾肺之強而枚其金矢之用於五噬其乾肉之強而收其金黃之用聖人待強梗之仁是也貞者正也厲者離火之嚴所以為德威也離初故未光離終故不明此離之中故得當也彖言不當而爻言當猶漢獄失當得當之云位與事之分也柔以居五本不當然能貞厲故用獄則得當矣

九四金剛而近五之中直故曰金矢六五黃中而近四之用剛故曰得黃金君臣以剛柔相濟亦皆用獄之道

上九何校滅耳凶象曰何校滅耳聰不明也

鄭玄云互坎為耳離為槁木木在耳上也滅耳校之厚掩過其耳不見也王弼訓漫不以初三上為刑為劓為刵郭雍氏曰書註劓輕刑荆辟為重漢書斬趾同于棄市初六小刑不當斷趾上九罪大復不當輕刑六二之刑何為返稱无咎上九輕刑何凶于二哉以是知三滅二非刑此說似矣不知

上九非輕刑滅耳非則胡仲虎又以馘耳為重刑
又豈知馘獨施之軍旅而馘亦不用何校哉朱先
生謂傷者亦非象旨

証字

依蔡邕石經作電雷

証音

據何氏告蒙約當作平讀

賁

離下艮上

賁亨小利有攸往彖曰賁亨柔來而文剛故亨分剛
上而文柔故小利有攸往天文也文明以止人文也
觀乎天文以察時變觀乎人文以化成天下

小利有攸往據郭京舉正謂不誤作小蓋上卦艮
止推之固可通矣鄭康成曰卦互體坎艮艮止于

例疑例

上坎險于下夾震在中故不利大行小有所之則
可矣是鄭以前不已作小矣又以自二至上為二
體亦非中爻不備之義馮椅曰今本誤當作柔來
而文剛故亨小分剛上而文柔故利有攸往非也
賁乃噬嗑例體六二之柔自噬嗑六五而來文內
卦上九之剛自噬嗑初九而分文上卦胡俞說是
也程先生以賁自泰來下文九二之剛二文上六
之柔朱義又推損與既濟既以紆曲矣天文上據
舉正脫剛柔交錯四字揚敬仲曰本質剛大柔來
文之則亨其功大本質大故也本質陰柔雖剛往

文之僅小利有攸往而已本質小故也今察其旨亦非文明者文理密察言乎其離也止者各止于至善言乎其艮也此知止能得之事也或言一陰一陽之卦自復姤來二陰二陽卦自臨遯來三陰三陽卦自否泰來或又謂彖傳凡言剛來柔來皆從乾坤二卦來皆非也昔孔子謂子貢曰夫白而白黑而黑夫賁又何好乎又謂子張質有餘者不受飾達此可以知聖人之學易矣

象曰山下有火賁君子以明庶政无敢折獄
明離象无敢良象无敢者詳審而後發也

初九其趾舍車而徒象曰舍車而徒義弗乘也

四互坎為車初之應也然文剛者在二初九有應而不受惟自潔以答二之好故稱義也

六二賁其須象曰賁其須與上興也

六二一陰施于二陽之間以文剛者也然成離之主而性炎上故為賁須之象也在頤曰須在口曰髭在頰曰髯侯果曰自三至上有頤之象二在頤下須之象也卦以文剛文實之曰此附上而興者也

九三賁如濡如求貞吉象曰求貞之吉終莫之陵也

九三有離文自飾故曰賁如有坎水自潤故曰濡如據而兩獲之象然三體剛履正故貞于二二者文下卦之主也與二同德故陰莫之陵

六四賁如皤如白馬翰如匪寇婚媾象曰六四當位疑也匪寇婚媾終无尤也

陸績以震為白為馬故曰白馬翰如震為白馬者馬為白足類為白類皆出震而震四之互象也康成謂六四巽爻者非檀弓云戎事乘翰翰白色未獲賁也朱先生謂為疾者非居艮之初而文柔之剛尚遠三為互坎之盜康成謂三見四適初未定

欲幹而有之是已非三之寇則與上為婚媾故象以當位疑釋之終謂上九四受上之文故无尤也朱先生謂九三剛正非寇乃求婚者則于象辭增守正不與殆近于支而贅矣當位疑何也欲退則失止之文欲進則懼三之難或飾或素內懷疑懼鮮潔其馬翰如以待雖履正位未果其志也

六五賁于丘園束帛戔戔吝終吉象曰六五之吉有喜也

艮為山丘為果旅而又在震林之上則上丘園也五與上皆无應于下然上本文柔之主五以柔中

亦能將幣以從之束帛者匹兩爲束六五以兩折
成交之象又坤畫九家爲帛有束帛象也陰爻盡
故用幣薄終也者上也五得上之文喜而後可知
也寧不吉哉王弼賁于束帛丘園乃落賁于丘園
帛乃淺淺用莫過儉泰而能約虞翻曰巽爲帛爲
繩艮手持故束帛以艮斷巽故淺淺它義可也以
巽爲帛改說卦耶李鼎祚曰五離爻離爲中女爲
蠶系束帛之象未詳何據子夏傳五匹爲束三玄
二纁象陰陽亦非也

上九白賁无咎象曰白賁无咎上得志也

上稱白賁賁者文飾也字從頁諧并聲貝水蟲
有雜文如錦者陰蟲也說卦曰坤爲文今上以乾
畫居賁終則以陽漫之故其賁白謂不雜也吳幼
清曰上復之二則二三四互兌爲白兌者故不取
白蓋失之矣得志者蘇氏曰柔之文剛也往附于
剛以賁從人也剛之文柔柔來附之以人從賁者
也以賁從人則賁存乎人以人從賁則賁從乎已
此上九之所以得志也陽行其志而陰聽命惟其
所賁故曰白賁受賁莫若白也

証字

據郭京舉証以不利脫文據舉正文上脫
有攸往之字作不字剛柔交錯四字

易象言外錄卷之一
剝

坤下
艮上

剝不利有攸往彖曰剝剝也柔變剛也不利有攸往
小人長也順而止之觀象也君子尚消息盈虛天行
也

據俞易趙氏輯聞剝也之剝音撲觀象者謂五陰
勢順然艮剛難止當早圖于觀卦二陽之時以柔
畜之故曰尚消息盈虛也觀謂卦名

象曰山附於地剝上以厚下安宅

初六剝牀以足蔑貞凶象曰剝牀以足以滅下也
六二剝牀以辨蔑貞凶象曰剝牀以辨未有與也

六二之辨何以未有與鄭玄云足上稱辨謂近膝
之下屈則相近伸則相遠也愚謂二俯則聯初仰
則望五正辨之象然皆陰類而无應故崔憬曰至
三有應二未有與也二小人之惡若上有剛德之
與則知有忌憚若五為陽則大觀在上而服矣即
象傳而彖傳之旨益明聖人不養人之惡而欲圖
于早如此不曰无與而曰未有則以治剝望上九
乎

六三剝之无咎象曰剝之无咎失上下也

位陽而又應陽與四陰異矣

六四剥牀以膚凶象曰剥牀以膚切近災也

膚者牀之膚崔憬謂薦席也京氏作簠謂祭器胡澹庵云取象簠以請義在焉夫牀何取於簠哉

六五貫魚以宮人寵无不利象曰以宮人寵终无尤也

五剥之主凡剥者皆其類也故雖體艮欲止而在下者將附以進五變巽爲繩而巽又有魚象洪景盧言易中魚皆指巽是也貫魚指下四爻皆從巽來如魚駢頭貫之以繩自上及下也五統群陰如后統衆妻四爲夫人佐后三下卦之長爲九嬪以

主九御二爲世婦初御妻寵宮人不及以政受之陰事尚順也望前先卑望後先尊剥之勢至五而極順而止之其權在五故其象如此彖傳曰觀象觀卦名也觀二陽之卦五所自變非謂觀察也終謂上九

上九碩果不食君子得與小人剥廬象曰君子得與民所載也小人剥廬終不可用也

艮爲果蓏蓏當二柔果當一剛上九之象故稱碩果也君子謂上陽小人五陰也與者下坤爲大輿下完而上覆可以任載陽无盡理也廬艮爲門闕

之象上壯而下撓雖有門闕不可用矣艮之爲門闕者在上故曰終上卦之終也朱先生云盧謂戟柄戟柄之簷從竹蓋積竹也與經文盧不同字而義又无取不如本義說矣何子元云與小象合者也

証音

據趙氏輯開剝也之剝音撲

復

震下坤上

復亨出入无疾朋來无咎反復其道七日來復利有攸往

復出入古註入則陽反出則剛長蓋剝一陽在外

倒轉爲復則反於內也无疾謂陽生有漸而不遽也五陰之朋來順一陽善補剝時之過无咎之象也虞翻曰出震成乾入巽成坤復取陽長而又何以言成坤哉朱先生以爲已之出入近人事舍取象之義矣吳幼清曰復自師而變師之初還復於二爲出師之二還復于初爲入謂一陽之出有師象可也而必師初復二二復初又取臨泰壯夫所變之卦還復未變之時以明明來之義尤爲游辭鑿說矣反復其道者程先生曰消長之道反復迭至也七日來復者卦起中孚六日七分也褚莊并

云五月一陰生至十一月一陽生朱義遂主之候
果又以函詩一日二日爲言見變日言日之意然
臨亦陽長而言八月則其說不能通於彼矣虞翻
李鼎祚皆本易軌謂爻主一日剝卦陽氣盡于九
月之終十月末純坤用事坤卦將盡則復陽來隔
坤卦六爻爲六日復來成震一陽爻生爲七日其
說原於易緯稽覽圖旣曰爻主一日剝陽盡于九
月終矣又曰十月末純坤用事坤將盡則復陽來
是不爲一月來復乎故卦起中孚六日七分爲復
者其義明矣養生家亦曰時有六候候當五日采
藥用一候半爲七日來復道樞易成子言抱一者
用四十九日而聖胎成人生四十九日而七鬼全
死四十九日而七魄絕此來復之數陰陽之極皆
有以窺此矣

彖曰復亨剛反動而以順行是以出入无疾朋來无
咎反復其道七日來復天行也利有攸往剛長也
剛反動而以順行古讀至動爲句剛言反見元貫
始終而今循之反舊也剝上九剛爲止反遂成震
爲動故曰剛反動陸剛反斷句若曰動而以順行
則動與行何所分視豫順以動不多一行字乎彖

言天行者蠱剝復也蠱亂極而治復陰而陽生乎
利往者以初初者復之主爻剛所自長也

復其見天地之心乎

天地以生爲心靜不可見而動可見也復見天地
之心與咸恒遯壯不同何也橫渠之言曰心隱于
微情發乎顯也輔嗣以寂然至无爲本夫陽動而
陰靜者也復一陽之卦何得言无言靜乎

象曰雷在地中復先王以至日閉關商旅不行后不
省方

先王也者先代之王也后謂時王也遵先王之遺
意而廣其條也閉關象坤之闔戶商旅象坤之衆
俞氏說如此震爲大塗商旅之路坤爲靜不行之
象坤爲地方之象顏師古訓方爲常謂常務非也
項氏曰豕取陽之復來故可以出入象取雷之在
地中故不可以行

初九不遠復无祗悔元吉象曰不遠之復以脩身也
祗按說文提出萬物之象居復之初知幾即復无
遠而提出已形之悔元吉之象也楊敬仲曰意起
爲放不繼爲復不繼不再起也元始也復于意未
動之始也其言簡明矣王肅陸績作禔安也荀爽

九家作致多也書不同文德明季長以爲適所以
之辭康伯侯果訓爲大鄭氏訓爲病皆於文義不
貫傳義皆釋云至然抵可訓至祇非抵也安有至
意哉

六二休復吉象曰休復之吉以下仁也

休讀如休休有容之休二才位俱陰柔順中正剛
之來復而无所競故稱休復正與下仁之旨符會
仁指陽所謂天地之心也王應麟曰復之初即乾
之元乾爲木果在春爲仁發生也下仁下附初九
二先生別申休義爲美非矣

六三頻復厲无咎象曰頻復之厲義无咎也

頻鄭氏作卑晁以道曰卑古文頻字今文作顰六
三才剛而位柔剛之來復順之則不堪競之則不
能故顰蹙以待之雖不如二然義无咎矣升陽子
曰三體震木而變火是始青天中碧落空歌也上
與坤交生浮黎土矣火性炎赫故稱厲土能生金
爲空氣金胎木體仁金體義故曰義无咎明金情
戀木慈仁也其亦窺此也乎

六四中行獨復象曰中行獨復以從道也

凡卦三四皆可言中如益三四皆以中行言又卦

五陰二三近陽五上遠陽四居遠近之中在震大塗之半故曰中行其稱獨復初一陽獨四應之也二以初爲仁四以爲初道者道自行言率性之義取四爲外體象也朱義四處群陰之中而獨與初應者虞翻指爲俗說譏切之曰中謂初震爲行初一陽爻故稱獨四得正應初故曰中行獨復蓋虞以中爲內疑於初九繇辭矣

六五敦復无悔象曰敦復无悔中以自考也

敦者坤土而隆其上之象六五陰之方盛然體柔順故能因四之獨復而附益以自託也俞氏曰二居下卦之中而休復四居五陽之中而獨復五因二四之中自考乎已之中是已考如考中慶襲之考以成訓者或于本義不協矣

上六迷復凶有災眚用行師終有大敗以其國君凶至于十年不克征象曰迷復之凶反君道也

上六陰暗之極居坤之成坤爲先迷故曰迷復鄭康成曰異自内生曰眚害物爲災也行師者坤爲衆荀爽謂上行師而距於初陽息上升必消陰終有大敗是也其君謂五虞翻謂坤爲邦國故國君凶十年者李鼎祚曰坤數主十也乾无十坤无一

陰數極于六而七則又為乾之始陽數極于九而十則自為坤之終故凡言十坤終之象此行師一事而象三行師大敗為已也以國君為人也十年不征兩師皆不興幸免凶敗然民離國弱遲之十年亦不能出也江夏劉績曰迷復凶有災眚此言不從陽之凶上六比君欲為六五征不服然終不克此言敵陽之凶是也及君道者五中以自考上六不中也

証句

據古讀象傳剛反動為句

証字

據鄭氏晁氏作

无妄



震下乾上

无妄元亨利貞其匪正有眚不利有攸往

妄者二陰畫耦之象无妄者一陽竒畫之象陽一

在內則不二故名无妄元亨利貞者據其體外來

為主者辨其分震下有外來為主之嫌猶所謂外

鑠非知能之良耳性无去來故文王特標之蓋以

辨聖學也卦象有此二義匪正指外來之剛謂初

也剛在上為正在下則稱外來說卦以大畜時无

妄災對言之剛自外來而主內則不若太畜之在

上蓋匪正矣故異自内生不利攸往之象也元亨

利貞者聖學也俞氏以上九當之云乾道之變非

天道之正夫乾道天道異乎哉夫俞氏泥實象過矣

象曰无妄剛自外來而為主于內動而健剛中而應大亨以正天之命也其匪正有眚不利有攸往无妄之往何之矣天命不祐行矣哉

卦以下爲內上爲外陽本在上故稱外來對大畜之辭也大畜以艮上一陽爲主剛在外无妄以震下一陽爲主剛在內程先生曰坤初六爻變爲震朱先生曰自訟來皆非也震卦一君二民主初陽內動而外健故大亨五剛中而應二故正正釋貞

天命猶言乾道天地之中正即道道即命也祐依馬氏作右大畜无妄反復之卦乾遇艮七而爲大畜卦圖右行逆數也无妄則震左行遇乾一乾不爲貞而爲悔乾運非大畜右行之時有无妄之災矣聖人觀圖察順逆之數明二卦反復之象以釋爲主匪正之義舊說以虛辭通實象非也

象曰天下雷行物與无妄先王以茂對時育萬物對時育物先王而君子不用者貴有其位乎物與依黃潤玉作讀張清子集註與即應字天雷而物應也

初九无妄往吉象曰无妄之往得志也

爻與象辭異象辭據六爻之反復言爻辭據六爻之定體言初九剛為主于內上應九四兩剛不相牽係直心而往此心之本體故曰得志

六二不耕穫不菑畲則利有攸往象曰不耕穫未富也

簡輔不耕不菑為讀據古註陸德明讀非无妄主震初動于六二坤土之下二以柔順中正而從之初先耕而二因以獲震為禾稼艮為手禾在手故有獲象田者一歲反草曰菑三歲悉耨曰畲初爻

非坤故不菑歷三位而五以剛中應之故有畲象往者往應五也陰虛故不富不求富也禮坊記易曰不耕穫不菑畲凶加凶焉記者不知易矣六三无妄之災或繫之牛行人之得邑人之災象曰行人得牛邑人災也

陰不中正居震極而互艮止不能攸往故象如此坤為牛指二坤畫離牝牛亦二也三本互體巽繩而係離牛艮鼻者五非三應稱或居上卦人位在震大塗稱行人應二故稱得牛牛為五得則三坤三畫為失所乘邑居六畫為邑人故以為災无詰

捕之象也虞翻曰乾四據三故行人之得三繫於四故邑人之災象旨不明矣

九四可貞无咎象曰可貞无咎固有之也

義謂陽剛乾體下无應與可固守是也不及初吉不如上无利矣有猶孟子言我固有之本爻固有之德耳義謂猶守者非

九五无妄之疾勿藥有喜象曰无妄之藥不可試也五何以有无妄之疾疾謂陰也吳幼清曰疾者以外物之應足以爲内心之病九五剛中则无妄其有應則疾矣候果謂四三妄處五乃憂疾是百姓

有過在予一人者今詳九四无妄處之迹聖人之應物來則照而去不留是猶无妄之疾耳不屏絕外物而外物自不能爲累何以藥爲哉藥者虞翻所謂巽木艮石稱藥矣

上九无妄行有眚无攸利象曰无妄之行窮之災也上九以乾主爻健極而居卦終故其象如此无妄之德動而健非禁其行者此蓋由位生也禍福无不自已求者无妄而更欲行則異自内生已非无妄又况於行而窮之乎楊敬仲曰窮之則災是也窮之也者窮之也往說文云之也由是而之焉故

吉行則進而有為也崔子鍾所謂下三爻貴動三則居者災上三爻貴靜上則行者凶也

証句據簡輔不耕不菑為讀

據黃潤王物與為讀

証誤據馬融不祐作右

大畜  乾下 艮上

大畜利貞不家食吉利涉大川

大畜大壯皆四陽占皆曰利貞何也胡仲虎曰壯而不貞其壯也剛而无禮畜而不貞其畜也博而寡要其不家食何也鄭氏說九三至上九頤象居外慕言兌口在四食于外皆是也虞翻二稱家二

五易位成家人家人又體噬嗑食者非李鼎祚乾賢人賢人在艮言闕故不家食亦非也利涉大川吳幼清云二四五上有舟象乾健應五上進有舟行而前之象

曰大畜剛健篤實輝光日新其德剛上而尚賢能止健大正也不家食吉養賢也利涉大川應乎天也據鄭玄管輅日新絕句管氏云朝且為輝日中為光蘇氏曰剛健者乾篤實者艮輝光者二物相磨而神明見也乾不得艮則素健艮不得乾則徒止以止屬健以健作止而德之變不可勝窮也上愈

上聲讀。謂陽尚賢者五等。上九之陽也。大謂陽。小畜巽陰畜陽。非正大畜。良陽畜陽。則正不。以止健之功。歸之于二陰之小也。止健不分。特曰能止。健有微推矣。不家食。四養初九之陽也。利涉大川。用乾之功也。乾在下體。亦謂之應天。以明天之理。无不在也。陰生于巽。巽陰之微也。故曰小畜陽終于良。良陽之究也。故曰大畜。良畜乾。貞巽畜乾。悔也。

象曰：天在山中大畜。君子以多識前言往行，以畜其德。

贊潤王曰：天者積氣貫乎地中。凡雲雷多自山出。此天氣之在山中者。虛齋趙氏曰：互震足兌口於中。爻有言行畜德之象。

初九有厲利已。象曰：有厲利已，不犯災也。

厲謂六四體。良為小石與初相磨。利已者受

畜也已。從陸夷止。反讀于夏傳云：居而俟命則利往而違上，則厲意近之矣。災謂艮山之阻。

九二與說輶。象曰：輿說輶中无尤也。

輿指二輶謂初也。二說輶與小畜同。小畜下有牽大畜下利已。小畜見止。大畜自止也。環溪吳氏曰：

輿說輶一也在小畜之三未免反目在大畜之二則无尤以其中也

九三良馬逐利艱貞曰閑輿衛利有攸往象曰利有攸往上合志也

乾爲良馬爲行健三陽皆良馬九三得位而初二隨其後故曰逐逐者追逐於後而不得馳上有艮止利艱貞之象也三四五上肖離爲日輿指二衛指初言九三居終日乾乾之地與二陽同心日討國人軍實而爲行計也大畜之權在上故曰能止健健而自止三所以合上之志也

六四童牛之牯元吉象曰六四元吉有喜也

艮爲少四在艮下得坤之初爲童牛體艮手持木而拘止之四應初初陽未進而止之用力易也童牛先角上剛畫象楅衡止之上爲畜主而四能分其任故其象如此元如喪元之元上也

六五豮豕之牙吉象曰六五之吉有慶也

五變體巽有豕象猶姤也豮如賁鼓賁實義大豕也陸氏云去勢本虞氏劇豕說然爾雅以豮訓豮也訓幼矣牙埤雅云以杙繫豕謂之牙上剛畫在前猶杙牙古註作齒牙非也二陽已進五以柔中

當尊位以畜之又有上九爲之左右故慶大于喜也二陰雖能畜陽然上爲成卦之主二陰之牝牙在焉二陰識所主故有喜慶也

上九何天之衢亨象曰何天之衢道大行也

陽居艮上畜道已成无復畜止之象何如何校之何梁武帝音賀負也王延壽魯靈光殿賦直云荷天衢以元亨鄭康成指艮背上乾首下爲肩荷物處陽乾爻有天象艮爲徑路天衢也長寧周尚書引莊生背負青天而莫夭闕者証之是矣馮氏椅曰外无陽爻則坤順不能畜内无陰爻則同類不相畜然則成大畜之義者在艮之上九而能畜乾之陽者在艮之四五也

証句據鄭玄管轄 証音利已之已從

証字據鄭玄王延壽梁武帝何天作荷 証音上從俞氏

頤 震下 艮上

頤貞吉觀頤自求口實

頤貞吉指艮卦似離目有觀象觀頤震觀艮也口容止上九體止之成故得專頤名言觀上所以養人者震動有求義自求口實指初言吳幼清以坎二易上成觀五易初成頤鑿矣

彖曰頤貞吉養正則吉也觀頤觀其所養也自求口實觀其自養也天地養萬物聖人養賢以及萬民頤之時大矣哉

自求而亦曰觀所謂知行之合一也口實非必飲食仲虺之誥曰恐來世以台為口實蓋言語為階養身者有道焉象所謂慎言語節飲食乃備其義耳

象曰山下有雷頤君子以慎言語節飲食

初九舍爾靈龜觀我朵頤凶象曰觀我朵頤亦不足貴也

靈龜謂四頤似離有龜象也四體良不食為靈初震動之主故舍靈龜而不養朱先生謂陽剛在下

是以不食上應六四之陰而動于欲非卦象互離為觀我指初朵震反生下垂之象謂初時淺位下不能養人及民徒自顧而垂下其頤以求食所志鄙劣凶之道也爾我與中孚同內外之辭也吳俞

皆謂爾初我上疑誤馮虞良我之說辭不達矣

也

六二頤頤拂經于丘頤征凶象曰六二征凶行失類也
說文曰顛頂也謂上九卦所由頤者傳義謂倒恐不然拂說文過擊也經古孟子註過歷也丘說文空也王肅謂六五是矣而意指良半為丘則以虛

字爲實象非也蓋六五有養人之位而无其德是
空頤耳然二雖中動求養于顛頤歷五而後至
飲食有爭道故擊之而後過也子夏劉一行以拂
爲弗云輔弼非是由頤者利之所在也丘頤者位
之所在也蘇氏曰見利而茂其位君子不以爲義
也二五皆陰類拂之則失類也

六三拂頤貞凶十年勿用无攸利象曰十年勿用道
大悖也

拂頤承上拂立頤而省六三陰柔不中不正而處
震極以三五同功故亦拂而求養焉動於欲求
而不觀故與上雖正應而凶十年勿用坤數也西
溪李氏曰口容止頤貴止不貴動艮止上三爻皆
吉震動下三爻皆凶也

六四顛頤吉虎視眈眈其欲逐逐无咎象曰顛頤之
吉上施光也

四亦顛頤然同體艮故吉艮爲虎卦背離目有視
象耽說文視近志遠馬君云虎下視也四下正應
初故視下爲近上與四非應非比故志上爲遠初
九舍四觀朵頤而來自養故四視之无得而遂仰
志於上如虎取食也漢書序傳引古文易作六世

耽耽或曰巽宮游魂卦非也自養于內者莫如龜
求養于外者莫如虎體艮上九由頤能應其求故
其欲逐逐逐逐薛綜云速也陰求口實乃其正故
无咎初指四為龜者肖其全四自為虎體其位外
剛猛而內陰險也上指上九艮有篤實光輝施光
言養及四也

六五拂經居貞吉不可涉大川象曰居貞之吉順以
從上也

六五失民為二三所拂愠起而爭則无助艮為居
順上九而居貞吉象也爻材柔而體艮止艮之主

爻適當其前故不利涉也

上九由頤厲吉利涉大川象曰由頤厲吉大有慶也

上九以剛居柔當卦之成行止之權在焉養君德

以養天下卦之所由以頤也艮為小石厲象心匪

石而不可轉止之義卦有舟虛之象故又利涉也

長初消以卦自坎變坎九五降初坎初六升五而

強者退後弱者進前故不可涉大川坎九二升上

坎上六降二強者進前弱者退後故利涉大川則

若巧而鑿矣 字音句無誤

大過  兌下

大過棟撓利有攸往亨

彖曰大過大者過也棟撓本末弱也剛過而中巽而說行利有攸往乃亨大過之時大矣哉

史繩祖曰本末字皆從木以一陽散于木下為本以一陽散于木上為末大過巽下兌上以四陽畫積于中二陰畫處于外消之木為上缺下短本末弱是也剛過而中四陽故稱過皆在內四爻故稱中非謂二五皆中二五絲皆無中意也剛雖過而蓄于中不用壯矣剛過而中則可立巽而說行則可權故本末雖弱而利往也

象曰澤滅木大過君子以獨立不懼遯世无悶

黃潤玉曰澤水漲而沒木澤之太過也君子體之故用之獨立不懼舍之遯世无悶呂仲木曰未有遯世獨立之行而不懼无悶是妄人耳

初六藉用白茅无咎象曰藉用白茅柔在下也

九二枯楊生稊老夫得其女妻无不利象曰老夫女妻過以相與也

二之五皆取象于屋齊民要術白楊堪為屋葺廣八卦之象曰巽為楊為白故枯楊白楊也繇者陸氏謂楊之秀上應兌澤故生楊近澤之木故以象

也大戴禮云五月楊稊稊者發乎朱先生云根非也卦以初爲本至二則非根矣老夫自互乾言女妻者兌爲少女二陽始過以與五虞翻謂二過初之長女與五五過上之少女與二是也朱義本馬荀說曰比初陰非象旨矣王弼曰老過則枯少過則稚以老分少則稚者長以稚分老則枯者榮是或方技之所祖乎

九三棟橈凶象曰棟橈之凶不可以有輔也

陽以陰爲輔三重剛自用而末又弱故不可以有輔也

九四棟隆吉有它吝象曰不棟隆之吉不橈乎下也

有它吝予夏傳曰非應稱它指三言朱先生以下應初六爲有他非也四與三比同是棟也三橈四羞與比之有它同下亦謂三四以陽居陰不至于大過故不因下而橈凡畫卦者自下浸而上故三視四得稱下

九五枯楊生華老婦得其士夫无咎无譽象曰枯陽生華何可久也老婦士夫亦可醜也

爻辭承九二言互陽之極以與二二之稊楊至是畢達而華二巽長女爲老婦至是得五互乾爲士

夫士夫者郭氏舉正云當作少夫剛過而在中故无咎居群剛之上而當大過之時故无譽一說吳幼清曰二三四互乾二乾之初士夫也九五變爲柔與九二應三四五互兌五兌女之終老婦也稱女稱老以卦畫之初終不以倫次起義荀君云五陽得正位數七故爲士夫然正位安知其不變哉醜如醜夷之醜老婦利非士夫之利故言亦可醜耳先儒或曰二當大過之咸故能交而生五當大過之恒奠其居而不交也

上六過涉滅頂凶无咎象曰過涉之凶不可咎也

下應于三如乾首沒兌澤中也大過二陰事陽過恭吳幼清曰初柔居下得所故仰承者謹而又謹上柔居高不安故下行者卑而又卑如行過涉水愈趨于下而沒其頂也楊敬仲曰見危授命而功不濟亦有從而議其非者則鄉原之道而見利忘義者得志矣

証字據郭氏士夫之士作少

坎  坎下 坎上

習坎有孚維心亨行有尚象曰習坎重險也水流而不盈行險而不失其信維心亨乃以剛中也行有尚

往有功也天險不可升也地險山川丘陵也王公設險以守其國險之時用大矣哉

坎何以稱習項氏曰重卦之序坎在六子之先故加習以起例郭京舉正及晁氏所載徐氏語皆云習上脫卦名坎字然景迂謂古文不脫何予元以吳斗南所傳費氏易正與今同云今卦爻辭上卦爻之名鄭玄實加也險為而不恃也維心亨身尚未亨也或曰中剛象心柔絡之象維中心之實不解故稱維心也行有尚者坎忌不流然本勞卦也故行則必通坎流水與兌澤盈科而進者異天險

指上坎地險指下坎互艮為山丘陵象本卦象為川也

象曰水洊至習坎君子以常德行習教事

陸司農曰趨而下者至也常德行則險而不變坎剛中之象習教事則險而能應重坎象也崔子鍾述俞易曰坎為兵戈詩常德以立武事月令仲春教振旅仲秋教兵非也按離為兵戈坎不為兵戈且坎之時用惟變所適亦不專指是也

初六習坎入于坎窞凶象曰習坎入坎失道凶也

窞王肅云坎底也在習坎之下故曰底說文云坎

中更有坎也習坎以全卦之時言入坎以二體之內言彖言習坎而爻繫于初者重險之下才弱而无以自援也道謂處險之道中正是也初陰之中正无以出險也

九二坎有險求小得象曰求小得未出中也

小得險中所得也陰小指六三九二才剛志柔未能出險與五皆以險相臨而不相應三方在險相待而全故易求也

六三來之坎坎險且枕入于坎窞勿用象曰來之坎坎終无功也

至曰來往曰之下坎方脫上坎在前之象此自重坎言險古文鄭向本作檢鄭云木在手晁氏謂象數合蓋互艮之下爲手而近震木檢之象也枕鄭云木在首三互艮之下而橫艮木於上爻枕象此又以互體取義古文作沈非也入于坎窞謂六三居坎之成流而趨下以附九二相與爲固也三與初同入坎窞而凶與勿用異者二三同患相恤初自以爲事外可免挾其險而不附故有失道之凶也五上亦然

六四樽酒簋二用缶納約自牖終无咎象曰樽酒簋

貳剛柔際也

四變則互離巽巽木而離大腹故象樽酒者坎玄水也簋互震竹器貳謂副貳缶爾雅釋盞孫炎云瓦器亦離鼓缶象禮器五獻三尊門外缶然可飾歌故詩云坎其擊缶四比於五箸樽盛玄酒肴實樂則用缶而已言其薄以相與也鄭云四互震上交辰在丑上值十可斟之象斗上有建星形似簋建上有弁星形似缶鑿甚矣天子大臣以王命出會諸侯主國尊於簋副設玄酒以缶故云艮手巽繩有納約之象四偶畫虛而通明有牖象四五相締不由戶而由牖非正應也六子本卦重者爻不相應義取近比而已坎四柔近比五剛故曰剛柔際

九五坎不盈祗既平无咎象曰坎不盈中未大也

祗依鄭作坻按詩宛在水中坻說文云小渚坎之象也澤水盈科而後進者九五坎中之陽流而不盈適平于坻而已蓋陽剛中正而能出險之象故无咎也或云坎不盈承上樽酒言之爾雅小壘謂之坎二五俱險陷之主二有險而五不盈上下之勢異也蘇氏云不盈所以納四也盈者人去之不

盈者人輸之象傳中釋坎未大釋不盈言九五剛中處險之用耳朱先生曰有中德而未大夫既有中德矣而有未大者乎

上六係用微纏寘于叢棘三歲不得凶象曰上六失道凶三歲也

坎上變巽為繩三股曰微兩股曰纏上不附五故係用微纏也坎為叢棘言叢棘則在地上非坎窞矣此坎之終也置叢棘者衆議於九棘之下三歲者取義卦之三畫上六陰柔居險極所恃險而已險窮則亡故三歲不得九家易曰害人者加明刑

任之以事能復者上罪三年而舍三歲不得則司園所謂不能改而出園土者殺矣故凶

証句據象傳正樽酒籃貳為句

証字據古文辭向本險作險

據鄭氏祗作抵

離三三離上下

離利貞亨畜牝牛吉

先利貞而後亨六二居下離之中則正六五居上離之中則不正故亨係乎貞之後矣坤為子母牛柔相依附也離得坤中爻而麗二剛非其類故止云牝牛蓋牡牛善觸乘匹則益悍老子曰牝常以

靜勝牡以靜爲下是也

彖曰離麗也日月麗乎天百穀草木麗乎土重明以麗乎正乃化成天下柔麗乎中正故亨是以畜牝牛吉也

重明以麗乎正此極言三才之離也俞玉吾曰上離重明下離正也 以上卦之重離麗下卦之正也異於家人正位之正程先生從孔疏曲爲五說曰陰居五位非陰陽之正乃事理之正夫陰陽事理可岐而二乎重明者本明而又明也其在人心則虛明神用无所不通意動故昏一日覺之緝熙

於光明則不識不知順乎帝則而无不皆正故曰重明以麗乎正以之爲言用也用重明即麗正非有所作意矯強也朱義止什卦名不信孔氏等卦體之言有遺論矣然則柔麗乎中正故亨以卦體言之五何以得中正乎曰五中而不正者也疑因上重明麗正而誤加麗正之語於中之下也若朱先生門人所錄語謂此說六二分數多胡氏遂附會之曰坎之剛中九五分數多故九五曰坎不盈卦辭釋有孚亦曰水流而不盈離之中正六二分數多故卦辭曰畜牝牛而六二爻辭亦曰黃離元

吉則亦恐不然矣

象曰明兩作離大人以繼明照于四方

陸司農曰起而上者作也繼明者緝熙之義非有兩明也

初九履錯然敬之无咎象曰履錯之敬以辟咎也

初當趾爲履居離之初附麗方始其履錯然文章歷珠之象又以陽剛而處明體爲能敬以辟咎也錯者俞氏以爲礪石引詩鶴鳴可以爲錯証之鑿矣楊用修曰錯古易作舄今改作錯不識古文篆耳按初本附二在下予頗疑之第曰履舄然則義不可通也

六二黃離元吉象曰黃離元吉得中道也

九三日昃之離不鼓缶而歌則大耋之嗟凶象曰日昃之離何可久也

九三不歌而嗟何也震爲鼓爲聲九家易離爲大腹缶象樂器也離變則所鼓非缶矣艮爲少男有返老還童之象人之老不以生爲樂則以死爲憂人能自作元命或順受正命則皆樂而不憂矣嗟亦震聲吳氏二三四互倒兌口者鑿蘇氏曰火得附則傳九三於四不得其傳而遇其窮也愚按莊

生薪窮火傳之旨識此則死而未嘗死也又何大
羞之嗟哉古文及鄭薛无凶字晁景迂曰无凶字
者得象數或曰日晏之離離爲樂也爾雅大琴謂
之離

九四突如其來如焚如死如棄如象曰突如其來如
无所容也

突如者下體之象突竈突也三四當繼明之時而
二剛相值三以舊火上升接四如火氣之出於突
四以新火逼乎五其猛烈如火之焚承繼可謂不
善矣九三无所附九四人莫之附皆窮者也然九
三咨嗟而已九四位過乎中壯火之氣衰矣不順
忽出剛暴陵爍孰敢親而豐之欲得五而五拒之
矣何所容哉

六五出涕沱若戚嗟若吉象曰六五之吉離王公也
沱若互坎水象戚坎加憂象嗟若互兌舌象六五
爲重離主繼明嗣位而不以位爲樂嗣天子之孝
百官總已以聽于冢宰之時也居倚廬而无命戒
悲不樂矣而終吉者以王與公相麗陰陽相資也
王指五公指上九家易曰陽當居五陰退居四五
當爲王三爲公四處其中附上下非也孔疏曰五

為王位而連言公便文會韻亦非也蘇氏王公指
上九簡輔公指二亦非也離以附麗為義五附上
而得助上為五折首獲醜寧不言乎內卦言日外
卦言火劉氏曰火乃日之用故分離爻體用也
上九王用出征有嘉折首獲匪其醜无咎象曰王用
出征以正邦也

上當離終之時火傳炎極而反于木離之木科上
稿五為成卦之主有空中之權也上五同體相比
故五用上以出征離明故有嘉首謂三乾畫為首
其指五五之醜類乃二二五皆離之主故所獲匪

二也正邦者三體兌剛鹵也離為兵戈征之所資
虞翻曰王為乾乾征坤陰類非也

考誤

據卦體五中而不正其曰柔麗乎
中正疑因上重明而誤加正字

據古文及鄭薛
是嗟下无凶字

馬

